

Karaloukta nütüma Pablo

nümüin

TITO

1 ¹Taya, Pablo, nüchepchiakai Maleiwa je Aluwataaushikai nütüma Jesucristo, e'itaaushi taya süpüla tekirajüinjanain na aneekajuushikana nütüma Maleiwa sünnain tü shiimüinkat süpüla katsüinjatüin tü nanoulakat sütüma. Nücheküin Maleiwa süpüleerua keisalainjatüin wayuu sümüin sukuaippa nu'upala. ²Katsüintpa naa'in na anoujashiikana nünain Cristo je kapülaitpa naa'in tü shiimüinkat, süka natüjaain saa'u sünnain shii'iranajaaipain naa'in süpüla eenjanain nümaa Maleiwa süpüla ka'ikat süpüshua. Paala sümäiwa nnojolüiwa'aya kasain ein yaa soo'opünaa mmakat, pansaatüjülia nünüiki Maleiwa sünnain naapüinjatüin kataa o'u namüin. Je nnojoiishi aküjüin alawaa nia. ³Je joolu'u so'u tü ka'i nüneekatüjütakat paala, ajütünüshi taya nütüma süpüla aküjaa nüchiki niakai, chi O'tte'erüikai waya, sümüin wayuu süpüla su'tte'ennüinjatüin.

⁴Anuu tü tashajakat pümüin Tito, pia tachonkai sünnainjee wayajiraain sünnain anoujaa nünain Cristo, chi taküjapü'üikai achiki pümüin.

Achuntüshi taya waneepia nümüin chi Washikai Maleiwa je nümüin chi Wasenyotsekai Jesucristo süpüla nee'iyatüinjanain na'anasia pümüin je süpüla naapüinjanain wane anaa pümüin.

Tü apütünakat apüla Tito cha'aya Creta

⁵Tapütüin pia cha'aya sulu'u tü mmakat Creta süpüla pikeraajüinjatüin tü kasa nnojotkat taa'inrüin otta süpüla püneeküinjanain wane laülaashii napüleerua na anoujashiikana sulu'u tü outkajaaleekat sainküin tü pueulokalüirua cha'aya. Soto paa'in tü taküjakat pümüin paala soo'opünaa tia: ⁶Chi laülaashikai sulu'u tü outkajaaleekat, niainjachi chi eekai lotüin nukuaippa no'upala na nuwalayuukana. Müleka ka'wayuusera nia, waneesüinjatü ne'e nu'wayuuse. Je müleka kachonle nia, anoujashiinjana naya sümäa nnojoliin ne'nnaajünüinjanain sütüma wayuu sünnain maa'inyaain naa'in je sünnain e'rülüin wayümüin naya nümüin nashi oo'ulaka nei. ⁷E'itaaushi nia nütüma Maleiwa

süpüla laülaainjachin saa'u tü a'yatawaakat nümüin sulu'u tü outkajaaleekat. Niainjachi chi lotokoi akuaippa sünaïn nnojolin kaluwanaajaralin nia sümaa jashiee. Nnojishi wayuujachin eperüi. Nnojishi wayuujachin katkaarai nia. Nnojishi kachiiruainjachin aa'in washirüü. ⁸Niainjachi chi eekai kapülain naa'in ni'iyou sümaa kachiiruain naa'in aa'inraa kasa anasü sümüin wayuu. Niainjachi chi eekai laülaain aa'in, eekai aa'inrüin tü nüchekakat Maleiwa nüpüleerua, je eekai akatalaain suulia kaainjalaa. ⁹Anakaja müleka ichere nia sünaïn tü shiimüin ekirajünakat anain nia, süpüla nüchecherüinjatüin naa'in na anoujashiikana süka tü pütchi shiimüinkat je süpüla ni'iyatüin sünaïn alawaain tü ekirajünakat anain natüma na ayouktakana tü shiimüinkat.

¹⁰Pütüjaa aa'ut sünaïn wainmain wayuu yala na'aka na anoujashiikana eekai nayouktüin tü shiimüinkat. Ayatshii wainmain na judfokana cha'aya sünaïn müin aka naa'in sünaïn nayouktüin tü shiimüinkat. Kaashajaaralii ma'i naya, e'ike'erülii wayuu süka nanüiki. ¹¹Mojusü ma'i tü naa'inrakat. Ekirajüshii naya sünaïn kasa eekai nnojolüin lotüin shii'iree washirüü. Je na kapülakana aa'in nanüiki, amalajaasü tü nanoulakat sütüma. Puu'ule'era naya suulia ekirajaa sünaïn alawaa. ¹²Müshii aka naya saa'in tü wayuu aküjünakat achiki nütüma wane atüjüshi Cretaje'ewai sünaïn maa: "Na Cretaje'ewaliikana, wayuu alaa. Wayuu e'rünnü wayumüin. Wayuu kasa ale't sümaa shukulain", müstü nünüiki. ¹³Shiimü'inya tia

pütchikat saa'in tamüin. Sükajee tia, püchiajaa na anoujashiikana suulia anoujaa tü alawaa nekirajakat anain nala wayuukana. Kasataalejese noo'ulaain tü alawaakat süpüla jüüjüünjanain nachikua sümüin tü shiimüinkat, ¹⁴sümaa nnojolüin kasajatüinjatüin namüin naküjala na judfokana oo'ulaka tü naluwataakat anain na moonooinkana sümaa tü shiimüinkat. ¹⁵Pütüjaa aa'ut sünaïn anain ma'i tü kasa naa'inrakat wane wayuu eekai wulein naa'in. Otta isasü nüchiki aa'inraa tü anasükat wane eekai manoujain, eekai kaainjaralin. Je nnojotsü nütüjaain aa'u sünaïn mojuin tü naa'inrakat no'ulu'u Maleiwa süka nnojolüin kachipünaain naa'in tü anasükat. ¹⁶Ni'raajüin Maleiwa naajüin, otta watüjaa aa'uchi nia sünaïn nnojolin ni'raajüin, süka nnojolüin naa'inrüin tü nüchekakat Maleiwa nüpüleerua. Isasü nüchiki naa'inrüin tü anasükat süka moonooïn sümaa nünüiki Maleiwa. Je süpüshua tü naa'inrakat, shia mojuka atüma naa'in Maleiwa.

Tü nikirajüinjatkat anain Tito na anoujashiikana

2 ¹Tito, lotüinjatü pukuaiippa sünaïn ekirajaa na anoujashiikana. Je tü pikirajüinjatkat anain, shia tü pütchi shiimüin tekirajapü'ukat anain pia. ²Otta na toologyukana eekai laülaayuuin, pikiraja naya sünaïn nalaüle'erüin naa'in süpüla kojütüinjanain sütüma wayuu, je sünaïn alinjatüin napüla wayuu süpüshua, je sünaïn nachecherüinjatüin naa'in sünaïn anoujaa.

³⁻⁴Akajaa na jieyuu eekai laülaayuuin, pikiraja naya sünaïn

keisalain sümüin nakuaippa süpüla ne'nnaajünüinjanain sütüma wayuu sünain nakatalaainapain suulia kaainjalaa. Püchiajaa naya suulia aashajawaa süchiki wayuu sujuuna, je suulia keejia in namüin eperaa. Shia anaka napüleerua nekirajüle na majayünnüükana oo'ulaka na ke'irumayünnüükana

sünain nee'iyatüinjatüin naalii na na'wayuusekana oo'ulaka na nachonniikana,

⁵ sünain laülaainjatüin naa'in, sünain wuleinjatüin naa'in, sünain naa'inmajüinjatüin nepia, sünain kamaneeinjanain sümüin wayuu,

je sünain jüüjüüinjanain namüin na na'wayuusekana.

Anasü nekirajüle naya sünain tiairua suulia mojujüin sünüiki wayuu sümüin nünüiki Maleiwa.

⁶Akaajaa na jima'aliikana, anakaja müleka püchiajaale naya suulia jo'uweein naa'in. ⁷⁻⁸Anashi müleka keisarale pia sümüin pukuaippa no'upala sümaa paa'inrüin waneepia tü anasükat. Lotüinjatü pukuaippa sünain ekirajaa süpüla kojutüinjachin pia sütüma wayuu. Je na ekirajülikana sünain alawaa, japüijeena süka nnojölüin kasain nayoujüin akajee waya.

⁹Otta müshi'iya na puwalayuukana eekai süchepchiain wayuu, pikiraja naya sünain jüüjüüinjanain waneepia namüin na kachepchiakana naya sümaa nnojölüin asouktakuu müin ne'ipajee. Naa'inrüinjatü süpüshua tü aluwataanakat anain naya süpüla talatüinjatüin naa'in namaa.

¹⁰Anakaja keisarale naya sümüin nakorolo na kachepchiakana sümaa nnojölüin na'luwajüin shia. Müleka

lotüle nakuaippa no'upala, eesü süpüla kapülain naa'in tü pütchi wekirajakat anain, tü nüchikikat chi Maleiwa O'tte'erüikai waya.

¹¹Müinjatü pukuaippa sünain ekirajaa na anoujashiikana, süka nii'iyatüitpain na'anasia chi Maleiwakai sümüin wayuu süpüshua je sünain nu'tte'erüinjanain naya sünainjee tü naa'inrakat Jesucristo süka ouktüin saa'u saainjala. ¹²Nüchiajaain waya chi Maleiwakai suulia süpüshua tü kasa mojutkat akajee nia watüma je suulia kachiiruin waa'in tü kasa mojusü keejiakat namüin na manoujainsaliikana. Tü nüchekakat chi Maleiwakai wapüleerua maa'ulu yaa, shia laülaainjatüin waa'in, waa'inrüinjatüin tü nüchekakat wapüleerua, je keisalainjanain waya sümüin wakuaippa no'upala. ¹³Waa'inrüinjatü tüü süma'inru'u wa'atapajüin tü ka'i talatashaateetkat o'u waa'in saa'u niweetüinjachin Jesucristo sümaa anashaateerüin ma'i nukuaippa wo'upala süka niain Wamaleiwasein miyo'ushikai, chi O'tte'erüikai waya. ¹⁴Naapajiraain nikii waa'ujee süpüla ouktaa süpüla taashinjanain waya suulia süpüshua waainjala je süpüla nüla'ajaain waainjala woulia. Nükatalüin waya nünainmüin süpüla nüpüshinjanain waya süpüla aa'inraa tü kasa anasükat.

¹⁵Tito, pikirajüinjatü anain tü taküjaitpakat pümüin. Pütütüla naa'in sünain anoujaa na puwalayuukana. Je püchiajaa na eekai kaainjalain, süka laülaain pia naa'u. Je nnojoleechi kasajachin pümüin chi eekai pülayaain naa'in puulia.

Tü jülüjainjatkat naa'in na anoujashiikana waneepia

3 ¹Tawalachee, püso'ira naa'in na anoujashii chakana süpüla jüüjüünjanain naya namüin na sülaülashiikana mma je süpüla yapainjanain naya süpüla aa'inraa kasa eekai anain. ²Püchiajaa naya suulia mojujain nanüiki sümüin wayuu sujuuna, suulia na'ülüjiraain, je suulia pülayaain naa'in suulia wayuu. Anakaja kamaneere naya sümüin wayuu süpüshua.

³Süpülapünaa wanoujain nünain Cristo, maa'inpü'u aa'inchii waya sümaa moonooloin sümaa nünüiki Maleiwa süka wayouktapü'üin tü shiimüinkat. Saa'u süchepchiapü'üin waya kaainjalaa, kachunraliipü'üshii waya. Kanainpü'üsü waa'in wayuu je kanainpü'üshii waya saa'inya. ⁴Otta chi Maleiwakai, anamiaichipa ma'i nia wamüin. Wanaa sümaa nuluwataain Cristo sa'akamüin wayuu, nii'iyatüin sümüin wayuu süpüshua sünain alin ma'i naya nüpüla. ⁵Nu'tte'erüin waya, nnojotsü sünainjeejatüin waa'inrüin kasa anasü, sünainjeejatü nümüliajüin waya. Je joolu'u, saa'u nüla'ajaaipain waainjala woulia, jeketüitpa wakuaippa süka shii'iranajaaipain waa'in nütüma chi Naa'inkai Maleiwa. ⁶Talatüsü ma'i naa'in chi Maleiwakai sünain naapüin chi Naa'inkai wamüin nünainjee Jesucristo chi O'tte'erüikai waya. ⁷Saa'u anajiraainapain waya nümaa Maleiwa sünainjee anamiain nia wamüin, nükaaliijain waya chi Naa'inkai süma'inru'u wa'atapajüin süpüla einjanain waya nümaa Maleiwa süpüla ka'ikat süpüshua.

⁸Tü taküjaitpakat pümüin, pütchi shiimüin. Je tacheküin süpüleerua püso'ijaain naa'in na anoujashiikana nünain Maleiwa sünain tü tekirajakat anain, süka anain ma'i shia. Müleka kachiiruale naa'in aa'inraa tü anasükat, katsüinjeerü tü nanoulakat.

⁹Jalia pia suulia a'ülüjirawaa namaa na ekirajülüikana sünain alawaa, süka yooteein ma'i naya süchiki ne'iruku na natuushinuukana je süka na'ülüjawein ma'i süchiki tü nuluwataakat anain Moisés. Nnojotsü kasain saamüin tia namüin na anoujashiikana. ¹⁰Wane wayuu, müleka nukatajire'erüle na puwalayuukana cha'aya, anashi püchiajaale nia suulia tü naa'inrakat. Müleka nnojorule nuu'ulaain süchikijee püchiaain nia piantua, nnojoi kasajachin nia pümüin. ¹¹Pütüjaa aa'uchi wayuukai chia sünain kale'eru'uin süchiki kaainjalaa. Shiimüin süsaleechin nia nütüma Maleiwa saaliijee nnojölüin niyaawajaain.

Wane pütchi nüpütaaya Pablo

¹²Otta tayakai, o'unajachi cha'aya Nicópolisüin süpüla chainjachin taya juyapuupa mmakat süka aijeerüin tü jemaiikat. Je joolu'u taluwataajeechi pünainmüin Artemas je nieechire Tíquico. Je nüntapa pünainmüin, anakaja müleka pu'unüle Nicópolisüin tanainmüin. ¹³Otta müshia Zenas chi pütchipü'tikai oo'ulaka Apolos, anakaja müleka pükaaliijüle naya süpüla o'unaa sümaa paapiin namüin tü kasa che'ojaakat. ¹⁴Je na wawalayuukana napüshua cha'aya, anashii müleka ayatüle

naya sünain aa'inraa tü anasükat je
 sünain tütüin süchiirua a'yatawaa
 süpüla nasülajünjatüin süpüshi
 tü nakanainkat namüin na
 nawalayuuwana eekai müliain.

¹⁵Na wawalayuu yaakana tamaa,
 asakitshii pünain. “Asakitshii
 jünain”, pümawalai namüin na

wayuu aikana apüla waya cha'aya
 sükajee wanaawajiraain naa'in
 wamaa sünain anoujaa.

Shiairia ne'e tü tashajakat
 pümüin. Tatüjaa aa'uchi chi
 Senyotkai sünain nii'iyatünjatüin
 na'anasia waneepia jümüin jiakana
 jüpüshua.